

館陶縣鄉土志 卷之二 三二一

74664

地130

539

部三一

光緒戊申年新刊

館陶縣鄉土志

館陶縣鄉土志序

自古書野分州夏書首敷厥土黨庠塾序王道易行於鄉凡人稟五行之秀物萃百產之精天應星宿之分地界河山之鎮周禮春官小行人掌邦國之志豈外一邑一鄉哉後世變封建爲郡縣改井田爲阡陌志之所關尤大故在天下則曰一統志在行省則曰通志在府縣則曰府志縣志所以宜土俗合民情而不失先王之舊者比物此志也余於戊申春攝篆斯土公之暇勸學赴鄉見其民性馴良士習循謹甚愜於懷及閱縣志一書始知創自前明至國朝乾隆元年續修迄今百有餘年書缺有間其運會之遷流

館陶縣鄉土志

序

一

山東官報局印

事物之沿革人事之代謝近或得諸父老之傳聞久恐湮沒而不彰俯仰流連余懷殊覺耿耿也適奉檄命編輯鄉土志於是延訪邑人學問淵博事理通達宋子金鏡熊子廷獻等謹遵奏定章程按目查考設局採訪詳加論斷裝成卷帙俾生斯土者披覽之餘心情愉快感發興起將且士學興讀書而知時務農學興力田而無游民工學興居肆而精製造商學興行貨而通有無境界中人皆學界中人富強由此而基文明由此而開鄉社比戶薰德善良風俗人心蒸蒸日上盛此予之所厚望也夫豈

光緒三十四年歲次戊申孟夏知館陶縣事壽州孫方際

仲傑氏撰

館陶縣鄉土志

序

二

山東官報局印

編輯館陶縣鄉土志序

志之義何自昉哉虞書教胥子推本於詩言志志者人心所嚮往下繫風俗之遷流上關世運之隆替第以誌諸空言比事屬辭未必深明大義何若志本實心神遊日想乃能見諸躬行此即論語志道志仁志學之本義也然豈待遠求哉大學平天下始有土而終財用生衆食寡足裕富強之基孟子友古人由一鄉而國天下頌詩讀書大開文明之祖鄉土所由來比物此志也獨吾陶乎哉陶志創自前明及

國朝乾隆紀元始燦然大備中經兵燹付之一炬撫今追昔陶

館陶縣鄉土志

序

一

山東官報局印

志之失修已百有餘歲矣光緒十有九年邑侯 劉公家善重行翻刊舊本光緒三十二年邑侯 方公子嘉奉新章命編輯大略究未成書今幸 孫公仲傑宰斯邑奉檄捐廉編輯鄉土志蒿目時艱熱心興學典至渥也鏡等承乏其選書生愚見安測高深第廣諮博採俾陶邑中之某水某山皆足益通今之智育一金一石更將發思古之幽情非偶然也於戲二三策書經秦火殘編斷簡下同沒字之碑一再傳典重漢文創制顯庸上契無聲之載雖未足語大學之規模然使童蒙輩遊釣弋之鄉觀風土之記集思廣益或有裨於飲水知源先河後海之意云爾是爲

序

辛丑科恩貢邑人宋金鏡撰

館陶縣鄉土志

序

二

山東官報局印

修鄉土志姓氏

知館陶縣事壽州孫方隆監修

拔貢候選直隸州判學務總董王鼎和全修

六品銜附生高樊紹業

辛丑恩貢邑人宋金鏡

編輯

廩生邑人熊廷獻

廩生李蓮舫

校對

高等小學堂科徐恩溥

候選訓導汪恒嶷

歲貢胡化南

館陶縣鄉土志

姓氏

一

山東官報局印

歲貢閻清臣

廩生李繼昌

婁巖嶺

劉士林

翟蘭彬

附生閻百朋

于慎輿

孫文傑

杜學篤

遺政中採訪

館陶縣鄉土志目錄

卷之一

歷史

本境建置

卷之二

政績錄

卷之三

兵事錄

卷之四

耆舊錄

附名宦祠

鄉賢祠

忠義節烈祠

館陶縣鄉土志

目錄

一

山東官報局印

卷之五

人類

戶口

氏族

宗教

實業

卷之六

地理

卷之七

山水

道路
卷之八
物產
商務

館陶縣鄉土志

目錄

二

山東官報局印

館陶縣鄉土志卷之一

歷史

上古畫野分州建邦啓土有一代之土字卽有一代之版章觀於周禮春官小史掌邦國之志凡帝京王國以及大都小邑此疆爾界佐史繪圖其制始備厥後改封建爲郡縣壞井田爲阡陌鄉邑都鄙之制代有異同要其創當代之規模新斯民之耳目者莫不因更姓改物以潤色鴻猷雖陵谷滄桑形勢變遷而屬名沿革在寰宇記風土記地輿圖諸書者披覽之餘瞭如指掌卽葢爾彈丸之區無不與天下大勢息息相關焉陶邑古冀州界其風純樸其俗

館陶縣鄉土志

卷一

一

山東官報局印

勤儉猶有陶唐氏之遺風且地邇孔孟之鄉人聞詩禮之訓居斯土者自當通今博古由唐虞三代及春秋戰國秦漢以降前屬何州何國後屬何郡何縣歷歷考核詳明庶不至貽數典忘祖之愆也志歷史

本境建置之始末

館陶居冀之東界唐虞夏商周屬冀州

春秋時晉冠氏邑後屬趙西北有陶邱趙置館於其側因名館陶

戰國時齊之西界屬魏

秦屬東郡兩漢屬魏郡武帝元光中河決館陶明帝時以其地

爲館陶公主食邑

魏晉屬陽平郡後趙徙陽平郡治於此

隋開皇初廢郡誤以屯氏河爲毛氏置毛州領縣四堂邑博平冠氏臨清大業初州廢北徙四十里建今治爲縣屬武陽郡

唐初復置毛州後復廢爲縣屬魏州改名永濟尋復置館陶縣天寶初屬魏州魏郡

宋建隆四年復置永濟渠於館陶尋復屬大名府金因之元屬濮州明改屬東昌府宏治二年陞臨清爲州割屬臨清編戶二十七里

國朝館陶縣屬東昌府隸山東布政使司

館陶縣鄉土志

卷一

二

山東官報局印

按館陶古冀州地有陶邱焉禹貢導洸水東出於陶邱北春秋時趙置館於其側館陶之命名以此陶山之取義亦以此府志云陶山在館陶鎮西南七十里大名一統志云在館陶縣之西南五十里館陶鎮之西北七里方隅里數參差互異康熙辛酉郎公來蒞茲土親歷邑西南查訪無跡作陶山記以誌之高岸爲谷深谷爲陵歷世久遠固未可臆斷也史載以館陶食主者三雖非通都大邑而枕陶山襟衛水土食舊德農服先疇要亦東郡之奧區也



館陶縣鄉土志卷之二

政績錄

政體所關不外教養儆於下若小人之德草行於上爲君子之德風時不以古今異地不以廣狹殊也遊塾序黨庠堂上仰鳴琴雅化觀桑麻雞犬田間譜鼓腹謳歌且也却暮夜之金四知自信折片言之獄三善同稱又况龔黃召杜寓撫字於催科等嚴父於慈母龍門作史不遺區區下邑也陶邑雖蕞爾彈丸或停高人之駕或下長者之車其政出儒吏者固多績著循良者亦不少託字下者擬以吏行冰上人在鏡心堪作神明之宰比之仁若春風化如時

館陶縣鄉土志

卷二

三

山東官報局印

兩更爲慈惠之師也志政績

隋

魏德深鉅鹿人初爲貴鄉長尋轉館陶長貴鄉人送之號泣之聲不絕於道既至陶老幼如見父母有猾人員外郎趙君實與郡丞元寶藏相交結前後令長未有不受其指磨者自德深蒞陶君實歛迹未敢出門貴鄉父老詣闕請留德深詔許之仍蒞貴鄉陶人悲啼而從者數百家

謹按德深爲政不嚴而肅去貴鄉而貴鄉人號泣相送去館陶而館陶人悲啼相從是人之懷其德也蒞陶而猾人歛迹是人之畏其威也愛克厥威威克厥愛舉而措之裕

如矣

劉仁恩開皇初爲毛州刺史倜儻有文武才治績號天下第一
召爲刑部尙書

謹按仁恩倜儻有文武才文則足以經邦武則足以戡亂
治績之昭著必有彰彰在人耳目者惜史不盡書耳

宋

劉筠字子儀大名人眞宗時爲館陶尉臨事明達治尙簡嚴會
詔知制誥楊億試選人校太清樓書擢筠第一嘗預修圖經及
册府元龜推爲精敏累官集賢院學士凡三入禁林三典貢部
以策論升降天下士自筠始

館陶縣鄉土志

卷二

四

山東官報局印

謹按劉筠三入禁林三典貢部以策論升降天下士洵無
愧一代之文宗又况臨事明達治尙簡嚴循吏儒林筠實
兼之矣

查道字湛然端拱初舉進士高第解褐館陶尉寇準荐其才授
著作佐郎淳化中徙封果州時寇黨尙伏巖谷詔書招諭未下
咸請發兵殄之道微服單馬直趨賊所賊悉驚畏持滿外向道
神色自若踞胡床而坐諭以詔意或識之曰郡守也嘗聞其仁
是豈害我者即相率投兵羅拜號呼請罪悉給券歸農

謹按查道微服單馬直趨賊所賊雖持滿外向而道踞胡
床坐神色自若道誠天下之大勇也所謂自反而縮雖千

萬人吾往者道實有焉觀於諭賊以詔意而賊卽投兵羅拜號呼請罪則一人賢於十萬師矣

宗澤字汝霖義烏人元祐六年進士哲宗時授館陶尉適朝廷隆冬開御河中使督之急役夫僵仆於道澤乃上書於帥以時方凝寒徒苦民而功未易集少須之至初春可不擾而辦帥用其言以聞上從之高宗南渡授東京留守屢次建功爲汪黃所阻憂憤成疾疽發於背諸將入問疾澤瞿然曰吾以二帝蒙塵至此汝等能殲敵則我死無恨衆皆流涕翌日風雨晝晦無一語及家事但連呼過河者三而薨

謹按宗澤授館陶尉值隆冬開河役夫多僵仆賴澤上書

以免則澤有愛民之心而民亦無不戴其德矣授東京留守欲建功而爲汪黃所阻憂憤成疾疽發於背而薨此又忠臣義士拊膺扼腕太息痛恨者也要之存保愛之心恩流蔀屋矢忠愛之忱氣壯山河雖大功不成亦天實爲之耳於澤何損哉

元

溫仲謙大德元年授館陶尹以德化民嘗行畝禾有一莖六穗民以爲異立嘉禾碑記

謹按仲謙以德化民禾有一莖六穗之異夫天人之相感其理不爽仲謙純用德化則是仲謙之德有以陰召夫天

和所謂和氣致祥者此之謂也民之立嘉禾碑以記之也
固宜

李藻字子潔潁川人順帝時爲館陶尹民相訟召兩造諭以禮讓往往悔謝去先是縣民輸稅爲攬納者所困藻爲嚴禁河溢隄決督丁夫塞之又上章乞蠲租罷稅市綾二千餘疋上官行縣咸嘉嘆移疑獄鞠之前後以十數後病歸民泣留滿道

謹按獄訟繁興刁詐必肆其毒租稅攬納良善必爲所困藻蒞館陶於訟者而諭以禮讓攬納者而設爲嚴禁又况河溢隄決上章乞蠲租稅以仁心行仁政民之所以共受其賜也諒爲有司當如是矣

沈瑀爲館陶尹民一丁課種桑五十株及棗栗等樹久之成林民享其利思之不忘著有政說一篇

謹按地利無窮在人興之而已瑀於民一丁課種桑五十株及棗栗等樹久之民享其利因民之所利而利之利之所以無窮也宜民皆思之不忘也

明

傅信之洪武初知館陶縣草昧經營人思其功

謹按制治於文明之世易制治於草昧之時難信之知館陶草昧經營人思其功則其禦災捍患興利除害必有大過人者矣

唐禎字廷瑞金州人監生天順間知館陶縣蒞政嚴明吏民束手奉法代者李寶以寬厚稱

謹按爲治之道寬嚴相濟嚴則民知約束寬則民得休息寬以濟嚴嚴以濟寬治道不外是矣

陰秉暘汲縣人進士嘉靖間由御史謫知館陶縣善談名理召諸生論經義娓娓不倦居官清簡省罰薄征歷陝西參議歸居衛水之濱絕迹公府所著有史綱心見四書疏義

謹按秉暘善談名理論經義娓娓不倦居官清簡省刑薄征處爲名儒出爲名臣秉暘真其人矣

高自新字本澄獲鹿人進士隆慶初知館陶縣天性莊嚴嘖笑

館陶縣鄉土志

卷二

七

山東官報局印

不苟愛百姓如子三年歲稔民和訟庭闕寂日讀書彈琴課奏第一累官知府以直方忤時屢起屢蹶所至民見德

謹按自新蒞陶愛民如子以致歲稔民和訟庭闕寂是能愛民者自能使民無訟也邑有良有司讀書鳴琴不下堂而成理謂非一邑之幸哉

晉調元字淑君長安人崇禎時由孝廉授館陶令會歲大祲捐俸煮粥民賴以活者衆旋癘疫流行民相繼死亡去故籍大半公清審編戶凡田地荒蕪者悉除其租壬午大兵抵城下公號令嚴明深得人心一時丁男悉登陴堅守婦女迭運磚石經久不渝城賴以全事上聞議優叙公卒士民建祠祀之